



# Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 3 Yangia anidakangma : f Tir Yimiyim tiryimiyim@aolima tir yimiyim TAPAK 8



Minister Atul Bora  
dak Covid-19 putet



Tzumetsung agi kongshir alidak Kim  
Jong-un-i teyari agütsütsü ashi

VOL. XVIII NO. 296 (ADOK 296) DIMAPUR

TENTONÜ (MONDAY)

LUROI (AUGUST) 09, 2021

₹ 5.00

## Tokyo Olympics temogo; France-i 2024 atema agizük



(Abelen) Paris Mayor Anne Hidalgo-i International Olympic Committee President Thomas Bach ket nungi Olympic wako agizükba sülen ayipshiba angur. (Achiji) 2020 Tokyo Olympics tembangba sentong nung National Stadium temalen fireworks angur.

**Tokyo/Paris, August 8, 2021 (Agencies):** Deobarnü Olympic Stadium nung France indang wako atsüketba sülen International Olympic Committee (IOC) president Thomas Bach-i Tokyo Olympics tembangba osang sangoktsü.

Covid-19 wara ajanga taküm

Tokyo nung tenokdangba aika lia Olympics mongogo.

India atema taküm closing ceremony ya tesüibatem dang nungi balaka liasü kechiyong Indian contingent-i medal 7 tashi nguteta liasü aser ibaji Olympics nung medal teimba anguba lir.

Deobarnü Olympics

tembangba sentong nung Tokyo aser Paris yimti anaprong nungi park scenes sayua liasü, kechiyong 2024 nung Paris nung amongtsi.

Tokyo nung agiba sentong nung "experience Tokyo" ta ser shilem balala agia liasü.

Taküm Olympic Games ya quarantine rules takang agüja

among aser stadium nung tereprangertem maliasü.

Külen, Paris nung Eiffel Tower nungi tenzüker ayong anasa fan zone nung nisung meyirjang aika Olympic baton agizüktsü atema adensi. Ajisüaka, ketdangsurtemi Covid vaccine certificates aser negative Covid-19 tests indang kuli

meshiba sülen ang fan zone-i nisungtem aiddaktsü.

### UNITED STATES-I GOLD MEDAL TEIMBAANGU:

Tokyo 2020 nung United States-i China den gold medal talila ka ngua temaba jenjang takok nguogo.

Deobarnü United States-i gold medal 3 tashi ngutet aser iba jagi China madak medal ka agi temaba jenjang takok angu. Tokyo 2020 nung US-i gold medal 39 aser China-i 38 angu.

Tokyo nung majurutepdang Athens 2004 nunga USA aser China kanga toktep aser tatem nung USA-i gold medal 36 aser China-i 32 nguteta liasü.

### 2024 SUMMER OLYMPICS:

2024 Summer Olympics dang Games of the XXXIII Olympiad aser Paris 2024 ta ajar. France yimtiba Paris nung July 26 nungi August 11, 2024 tashi amongtsü.

Paris 2024 ya July 26 nü Stade de France nung tenzüksü aser saisapong 32 nung telemsa 329 asayatsü.

## COVID-19 Nagaland: 77 dak putet, 89 taneptsü angu & 2 asü

**Kohima, August 8, 2021 (TYO):** Deobarnü Nagaland nung nisung 77 dak COVID-19 putet aser nisung 89 taneptsü angu.

"Tanü nisung 77 dak COVID-19 aliba putetogo. Parnokji Dimapur o Kohima nung metsür tii (28), Mokokchung nung 9, Tuensang nung 6, Phek o Zunheboto nung anana (2) aser Kiphire o Wokha nung kaka (1) lir. Parnok züngsema nisung 28,628 kümogo" ta Integrated Disease Surveillance Project atema State Nodal Officer, Dr Nyanthung Kikon-i ashi.

Deobarnü COVID-19 puteta alir nisung 89 taneptsü angu. Parnokji Kohima nung 37, Dimapur nung 29, Mokokchung nung 9, Tuensang nung 7, Phek nung 5 aser Longleng nung 2 lir. Parnok züngsema nisung 25,846 taneptsü nguogo, ta paisa metetdaktüsü.

Nagaland nung COVID-19 nungi taneptsü angur 90.28% lir aser nisung 1,380 anepaludar, ta Dr Kikon-isa ashi.

Deobarnü Mokokchung nung

COVID-19 puteta alir nisung 2 asüba züngsema tasür 585 kümogo, saka nisung 14 bo tanga tashidak ajanga asü, ta paisa shisem.

Tang tashi nung COVID-19 alitsü akok ta temolung melemi bilemba sample 276,816 tendangogo. RT-PCR ajanga 104,193, TrueNat ajanga 69,900 aser Rapid Antigen Test ajanga 102,723 tendang, ta Dr Kikon-isa ashi.

"Honibar tashi nung nisung 630,156 nem COVID-19 vaccine indang dose 788,220 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,829, healthcare workers 15,983, arishi küm 45 ser temapur 187,804 aser arishi küm 18 nungi 44 tsünga alir 365,540 lir" ta paisa ashi.

Vaccine agirtem rongnungi nisung 158,064-i dose anaprong agiogo. Parnokji frontline workers 41,041, healthcare workers 12,588, arishi küm 45 ser temapur 104,015 aser arishi küm 18 nungi 44 tsünga alir 420 lir, ta Dr Thurr-isa ashi.

angutsü" ta parnokisa metetdaktüsü. Deobarnep 7:00 ako tashi nung linük nung Covid vaccine indang dose 50,68,10,492 agütsüba osang lir. Tanü dose 55,91,657 tashi agüja liasü.

January 16, 2021 nungi India nung COVID-19 vaccine agütsüba maparen tenzüka liasü aser iba mapang healthcare workers nem agütsü. Iba sülen February 2 nungi frontline workers nem agütsü tenzü.

Maneni, March 1 nungi arishi küm 60 ser temapur aser temang nung tashidak aketer arishi küm 45 ser temapur nem COVID-19 vaccine agütsütsü tenzü.

Ano, April 1 nungi arishi küm 45 ser temapur ajak nem agütsütsü tenzü aser May 1 nungi arishi küm 18 ser temapur ajak nem agütsütsü tenzüka liasü.

## NSMDC-i Tizu apu yangluba nung Rs 20.72 crore talila endok: CAG

**Kohima, August 8, 2021 (TYO):** Mapa inyakterem küm ana dak tema süiaka contractor-i kuli tejanga magütsü sen talila endokba Nagaland State Mineral Development Corporation Limited (NSMDC)-i agizük ta Comptroller and Auditor General (CAG) of India-i metetdaktüsügo.

NSMDC-i April 2017 nungi March 2018 tsingda senotsü endokba audit August 2018 nung agi ta CAG report nung metetdaktüsü.

December 2010 nung Ministry of Development of North Eastern Region (DoNER)-i Nimi-Laluri road nung Tizu River temdanga metre 100 talang apu yanglutsü atema Rs 15.73 crore agütsütsü agizüka liasü. Iba ya Non-Lapsable Central Pool of Resources (NLCPR) kübok Central (90%) aser State share (10%) inyakyim nung agütsüba liasü, ta CAG-i metetdaktüsü.

Iba amaji India sorkari instalment aem lemsar Rs 14.16 crore parnok shilem agütsü, ta parnokisa ashi.

January 2011 nung Managing Director, NSMDC-i Notice Inviting Tender agütsüba nung telok aseme shilem agi aser iba nungi jenjang tajemba agütsüba contractor nem Rs 15.43 crore indang mapa inyaktüsü agütsü, ta CAG-i metetdaktüsü.

Iba mapaji February 2011 nung tenzü aser May 2015 nung tembang. Contractor nem running accounts (RA) bills 4 nung Rs 15.38 crore indang bills

agütsü aser iba nung Nagaland state lemsükba sen dena liasü, ta CAG-i ashi.

Mapa tembangba aser July 2014 nung RA bills kübok sen ajak agütsüba sülen contractor-i July 2015 nung apu indang Rs 15.42 lakh per metre span nungi Rs 35 lakh rate/cost melenshitsu indang agütsü. Iba apu den mesüktepa yangluba aputem jenjang dang nungi tajemba liasü ta shia contractor-i jenjang melenshitsu ashi.

Kasa mapang nung NSMDC-i August 2016 nung mapa tembangogo ta asüba completion certificate agüja liasü.

Contractor-i ashiba onük nung ajemdaker November 2016 nung High Level Technical Committee (HLTC) kati 'general abstract of cost' agizük aser 32.80% talila kümtsür sen endokba nung Rs 19.62 crore bendenlok. Ibaji Rs 15.38 crore endoka yangluba nungi Rs 35 crore aküm, ta CAG-i metetdaktüsü.

November 2016 nung State Level Project Implementation Committee (SLPIC)-i sen talila akümbaji agizük aser HLTC/SLPIC-i ashiba nung ajemdaker Finance Department, Nagaland-i State Plan kübok Rs 20.72 crore lemsüktsü.

NSMDC-i RA bills pungububa aser trokbuba renemer January aser May 2017 nung Contractor nem instalment ana lemsar sen talilaji agütsü.

Apu yangluba nung sen talila endokogo ta asüba agizükbaji

bidding maparen den meputep kechiyong Contractor-i pa sasa jenjang latet aser ibaji shitak dang liasü. Ano, General Financial Rules, 2005 nung Rule 204 ajanga work order mesüra contract deed agreement nung jenjang melenshitsu indang kecha shia mali, ta CAG-i metetdaktüsü.

Mapaji May 2015 nung tembangba kulikaket agütsü aser April 2016 nung contractor nem Rs 15.38 crore agütsü. Ano, 'extra item of works' (River diversion works) ta ser Rs 4.78 crore agütsübaji original project estimates nung dena mali, ta parnokisa ashi.

Iba mapa inyakba nung NSMDC-i tim mesüi inyakba ajanga Rs 20.72 crore talila endoktsüsa aküm aser iba inyakyim ya GFRs alema inyakba lir, ta CAG-isa ashi.

January 2020 nung Nagaland sorkari telangzüba agütsüba nung Contractor-i onük benokba aser HLTC o SLPIC-i agizükba nung ajemdaker additional revised cost lemsüktsü ta ashi.

Ajisüaka, sorkari telangzüba agizükbaji magizüker kechiyong contract nung sen melenshitsu indang telatetba kecha mali aser ibajia mapa tembangba sülen ang agütsü, ta CAG-i ashi.

Külen, NSMDC-ia scientific basis nung ajemdaker mapa meinyak aser Contractor-i sen talila endok ta ashiba pusema yaritep. Anungji Nagaland state sorkari iba inyakyim bushisüngdangtsüla, ta CAG-isa metetdaktüsügo.

## WhatsApp ajanga Covid vaccination certificate angutsü

**New Delhi, August 8, 2021 (Agencies):** COVID-19 vaccine agirtemi mapang tatsüka tsünga WhatsApp ajanga vaccination certificate angutsü, ta Deobarnü Health Ministry-i metetdaktüsü.

Taoba mapang nisungtemi CoWin portal nungindang vaccination certificate agizüka liasü. "Technology amshia inyakyim tezübaba kümdaktüsür. MyGov Corona Helpdesk ajanga COVID-19 vaccination certificate melamela agizükang" ta tanü Union Health Minister Mansukh Mandaviya indang office-i ashi.

"Nü indang phone nung Contact number: +91 9013151515 save süang. Iba sülen WhatsApp nung iba number dangi send 'covid certificate' ta zülur yokang. Second ishika tsünga nü indang certificate

### Mkg health center 77 atema home isolation kit agütsü



Chief Medical Officer Office, Mokokchung nung Dr Ayangla Saku, DPO (UIP & RCH), Dr Temsuyanger, ZLO & DMHP aser Zerutso Kesiezie, EAC HQ, Mokokchung nungertem lia August 5, 2021 nü Dr Limatula Aier, Medical Superintendent, IMDH ajanga COVID-19 teyari osettem agizükba noksa ka yangi angur.

**Dimapur, Luroi/August 08 (TYO):** Mokokchung District nung aliba nüburtemi nüngdakba peritsütsü atema Sisterhood Network aser The Naga Rising ajanga health center 77 prong nem special home isolation kit densema COVID-19 dak sendakba teyari oset balala agüja liasü. Item oset ya Gujarat nung amenoka aliba Foundation for Ecological Security (FES) ajanga tenlaba alitsü.

Home isolation kit ya teka agi atakba juli nung benden, koba Sisterhood Network nung inyakertemi ar aser yangji pulse oximeter, digital thermometer, Glucometer, glucostrips, N95 mask, face shield, disposable glove aser hand sanitizer dena liasü.

Mozüki dak alaka tesem balala nung COVID-19 cases mapang shidak nung anepalutsü aser temang agi melaba ama

tekeratiba nung temang anepalutsü nükjidong nung item oset ya agüja liasü.

Ketdangsürtemi ashiba ama, Nagaland nung COVID-19 agi shiranger ya temang kanga mejungi akumba sülen ang mozü kidangi bener arur, aser ibaji tebilemtsü tulu lir. Ibai talisa nüburtem asoshi temang anepaluba oset peria maliba ajanga lir, aser iba yongji temang junga mereprangteter.

Iba amala home isolation kit aliba ajanga COVID-19 agi meneper alirtem ajangzüksü aser mapang shidak nung temang anepalu sütettsü, ta Sisterhood Network aser The Naga Rising ajanga sangdong ka nung ashi.

Home isolation kit den külemi Covid Hospital Mokokchung aser Covid Care Center atema PPE kit 600 aser 'disposable bed sheet' tem dena teyari oset balala agütsü.

Mokokchung atema COVID teyari oset ya mapang shidak nung aruogo, ta ADC Mokokchung, Shashank Pratap Singh IAS ajanga tepela shidi ka zülua liasü.

"Telok balala lungjemer yamai inyakba ya asenok lungjemer COVID-19 tashidak wara den raraba nung talangka teyari alitsü," ta ADC ajanga shidi nung shia liasü.

Kasaji Chief Medical Officer, Mokokchung, Dr. R. Chubala Aier-ia shidi ka nung COVID-19 tashidak wara den raraba nung shilem tajung agia mozüki aser health center tem nem teyari agütsüba asoshi pelaba lemsatepa liasü.

"Tang ama timtem balala agi sünger aliba mapang nenoki teyari agütsüba ya ajanga district nung teyari nüngdaka alirtem yariba nung shilem tulu agitsü," ta shidi ajanga ashi.

### NSCN/GPRN (K), Dimapur Town Command ajanga bike pezü ngutet

**Dimapur, Luroi/August 08 (TYO):** NSCN/GPRN (Nikki) indang Dimapur town command office ajanga August 7, 2021 nü motorcycle pezü nguteta liasü.

Col. Vicky, Commander, Town command ajanga ashiba agi, town command nungi bendanga agütsür inyakba team ajanga lungjemer item bike ya nguteta liasü.

Nüburtem ajangzüksü asoshi nübur indang sorkar, town command ajanga maneni mapa inyaktsü, ta pai ashi.

Iba osang sangdongba sülen anogo 7 tsüngta item motorcycle kiburtemi document chichiba bener arua agizüksüla, ta metetdaksü.


Item motorcycle jangjashia meshitsü asoshi office den 9862334833 nung tongteprateptsü akok.

NSCN/GPRN (Nikki) indang

Dimapur town command ajanga item motorcycle ya nguteta liasü:

1. Hero Glamour  
Regd.no. AS 094 5471  
Chassis no.  
MBLJAW072K9F02527  
Engine no. JA06EHK9F17296  
Sentsü tanak
2. Apache RTR 160  
Regd. No. N/A  
Chassis no.  
MT634PE43H2H35026  
Engine no. BE4HH2134456  
Sentsü tanak
3. Hunk Hero Honda  
Regd. No. N/A  
Chassis no.  
MBLKC13EA84E05830  
Engine no. KC13EA89E05476  
Sentsü tanak
4. Pulsar 125  
Regd.no. N/A  
Chassis no. MD2A170-7DWC17677  
Engine no. JEZWD025127

### "Tsüngremi Saklokbatem" kaket ka saya



August 08, 2021 amongnü Dimapur nung mapang tajung ka agiteta tesayur, sayutsüngir aser kaketzülur Wt.Imtjungla Longchari zuluba kaket ka tenüng agi "Tsüngremi saklokbatem" ABAM nung Church & Mission nung Secretary Rev.L.Yapang Mollieri sayatsuba noksa nung angur. (Noksa nung abelen nungi - kaket zulus kinungbo aser Discipleship Bible College nung principal, Rev. S.Wati; Rev. L.Yapang Mollier & Wt.Imtjungla Longchar )

### Security Forces temi NSCN (IM) indang camp raksatsü



**Dimapur, Luroi/August 08 (TYO):** Security Forces aser state police tem lungjemer August 06, 2021 nü general area Menkirong, Wokhan nung NSCN (IM) indang ozüng alema yanglua aliba camp la raksatsü, ta sangdong ka ajanga ashi.

Osang tejangja kar nung ajemdaker Security Forces aser state police temi iba camp ya raksatsü aser NSCN (IM) züngsem pezü apu, AK Rifles pezü, M-16 Rifle ka, 9mm pistol

ka den injang asem, 7.62mm indang injang 446, pouches 12 aser military uniform trok nguteta liasü.

Iba ken o maneni bushisüngdangtsü atema pua alir den parnok ket nungi ngutetba oset ya Bhandari Police Station, Wokha District nem agütsüogo, ta sangdong ajanga ashi.

Maneni Security Forces den state police lungjemer operation ka August 6, 2021 nü general area Padam Pukhuri, Dimapur

nung agiba mapang nisung ka pua liasü.

Osang kar nung ajemdaker Security Forces aser state police temi mita aoba mapang general area Padam Pukhuri, Dimapur nungi nisung ka apu aser pa ket nungi point 22 pistol ka nguteta liasü.

Iba ken o maneni bushisüngdangtsü atema pua alisang den pa ket nungi ngutetba hadir ya East Police Station, Dimapur nem agütsüogo, ta sangdong ajanga ashi.

**Dimapur, August 08(TYO) :** Nüngtugu kaket zülur, tesayur aser sayutsüngir, Wt.Imtjungla Longchari Ao oshi nung züluba kaket ka tenüng agi "Tsüngremi Saklokbatem" kaket tanü amongnü August 08, 2021 anogo nung mapang tajung ka agiteta Dimapur nung Tir Yimyim adokdak tesem nung ABAM nung Church & Mission Secretary, Rev.L.Yapang Mollieri sarasadema sayatsüogo.

Iba kaket sayaba sarasadem sentong mapang tatsüka agidang, Rev.L.Yapangi Tsüngremi nübortem den kaket ajanga jembitsü asoshi tesayur tajung Imtjungla ama moatsüba atema Tsüngrem nem tenüngsang agütsü aser kaket tajung aika zülua nübortem temoatsü ngudaktsüba atema kaket zülur dang pelaba shisem.

'Tanü putu nung asenok rongnung kaket zülur tajung aika lir saka kaket azünger kanga ajema lir, iba jagi kaket zülurtema timatemer aser nübortema shisatsü agi anünger. Anungji, kaket alia azüngtsüba ya lokti tentet telongjemtemi dena pei nübortem ajungshitsüla. Kaket azüngba agi dang asen oshia renloktsü aser asenok shisa takaba akümtsü,' ta ABAM lenirisa ashi.

Tsüngremi Sakloka kaket nung ya Tsüngremi kangasa

saklokbatem rongnung shiruru, ozüsangnü, naro, süngjang aser oset tapu ajak agi tertenet shimteta kaketzüluri parnok nungi asenok temoatsü aser tajangzük angutsüsa tetezü aser tejen tar nunger otsü dena bushiteta zülüja lir.

"Naia putir Aron sübotsü nung jarem enoka arloker asembaji bilemdanger na? Meimchir ya san den medemdanga jembiba ya naia khenbo angatetsü meranger na? Oliv, almond aser tsükmenatsü dak taneptsü mozü keta alibaji naia chidangtetter na? Kechiba alushijak ozü tila ya Laishiba nung yamai nüngtugu? Naia ozütem rongnung chuba mongzü mesüra Lebanon nung Cedar sentsüwangshi indang aroka bilemdanger na?" ta kaket züluri la okila nung tasüngdangba kar tazüngerter nem bilemdangdaksüsa agüja lir. Item tasüngdangbatem nung telangzüba aser tetezü tarok ajakji iba kaket nung rasaa shia lir.

Iba "Tsüngremi Saklokbatem" kaket ya Wt. Imtjungla Longchari Ao oshi nung züluba kaket pongobuba asütsü aser laisa English oshi nunga kaket 18 tashi zülüogo.

Tanü sayaba kaket ya kaket ayokba tesemtem nung sen jenjang Rs.250/- agi angutsü.

# Kokrajhar nung NLFB züngsem 32 temai adok



**Guwahati, August 8, 2021 (Agencies):** Deobarnü Kokrajhar district nung National Liberation Front of Bodoland (NLFB) telungpur 32 tashi temai adokogo.

Indo-Bhutan arrtsü anasa Jharbari nung platoon commander B Harfer-i anir NLFB züngsem 23 temai adok.

Parnokji police-i NLFB indang designated camp-i anir aotsü. Iba tesem nung yimdaklir aika tzü bottle aser naro amer adenshia telungpurtem pelashishia agizük.

Taoba mapang temai adoka aliba NLFB züngsem kar iba tesemi arua külem züngsemtem

pela agizüka liasü.

July 22 nü NLFB tekolak M Batha-i anir züngsem 23 tashi temai adoka liasü.

Yaküm January ita National Democratic Front of Bodoland (NDFB) telok pezüi Centre sorkar den Bodoland Accord agiba sülen M Batha-i aniba NLFB telok ya tenteta liasü.

# TSF-i 'Greater Tipraland' movement nung denogo

**Agartala, August 8, 2021 (Agencies):** Tripura Students' Federation (TSF)-i "Greater Tipraland" movement den teka amtepogo. Deobarnü, Agartala nung TSF lennirtemi iba telemtetba indang osang sangoktsü.

Tripura nung TSF ya kaketshir tentet mezüngbuba aser tuluba asütsü. Northeast Students' Organisation (NESO) nunga TSF ya züngsem ka lir.

Greater Tipraland movement nung adentsü osang angashia TIPRA chairman, Pradyot Debbarma-i TSF dang pelaba metetdaksüogo.

"Nia TSF nung dena inyaka aruba nübu ka lir aser parnokki (TSF) iba mapatong nung

pusema nungittsü bangjemtepba osang angashia pelaseter. Asenok ka küma longjemer külem nübur asoshi ola adoktsüla," ta Debbarma-i ashi.

Pradyot Debbarma-i aniba TIPRA ajanga "Greater Tipraland" movement achaayanga inyakdar.

Taoba mapang The Indigenous People's Regional Alliance (TIPRA), Chairman, Pradyot Debbarma-i, "Greater Tipraland" mapatong tejakleni bener aotsü asoshi party indang teinyaktsü tongtibangtiba asütsü, ta jangja jangjaa shiogo.

Debbarma-i ashiba agi, political party kari danga TIPRA den lokteptsü asoshi bilema lira, tamasa parnokki

party indang 'Tipraland' takhangba agizüktsüla.

"Onoki akhangba rongnung 'Greater Tipraland' ya tongtibangtiba asütsü. Political party kari danga TIPRA den lokteptsü tejangraba lira, parnokki iba mapatong pusema tebilembatem tezüluba ajanga onok dang metetdakja azüngashiteptsüla," ta Debbarma-i ashi.

"Tebang agi nangzükba yabo tetezü kecha mali. Ozü Tiprasa nüburtem mashioktsütsü. Tejangraba aser tebilemba tem tezüluba ka ajanga metetdaksü tashi, tanga yimya ajanga aruba ni magizüktsü," ta Debbarma-i shisem.

# Manipur-i Neeraj Chopra nem Rs 1 crore senpet agütsütsü

**Imphal, August 8, 2021 (Agencies):** Manipur sorkari Tokyo Olympics Gold medallist Neeraj Chopra nem Rs 1 crore senpet agütsütsü metetdaksüogo.

Honibar aonung tesü Manipur chief minister Biren Singh-i iba osang metetdakja liasü.

"Küm 100 sülen India-i athletic asaya nung Olympic

Gold medal ka ngutetogo aser iba tenüing nung Manipur State Cabinet-i Javelin throw Gold medalist Neeraj Chopra nem Rs 1 Crore senpet agütsütsü telemtetba agiogo" ta Manipur CM Biren Singh-i Twitter nung metetdaksü.

Honibarnü Neeraj Chopra-i Olympics nung India atema athletics nung mezüngbuba gold

medal nguteta konang bentsür arua liasü.

Tokyo Olympics nung Neeraj Chopra-i javelin finals nung 87.58 m tashi merepba ajanga gold medal angu.

India nung shooter Abhinav Bindra-i anguba sülen Chopra-i Olympics nung individual Gold tanabuba ngutetogo.



August 5, 2021 nü Arunachal Pradesh kübok Changlang District nung Security Forces aser State Police yaritepa NSCN-K (YA) züngsem ka puogo. Osang tejangja ka angazükba sülen Jonpho Hate mita aodang NSCN-K (YA) züngsem apu aser pa ket nungi AK-56 Rifle den Magazine 3, 7.62 MM rounds 121, Lathode ka, 7.65 MM Pistol ka, magazine ana, 9 MM round 10, Pistol cover ka, Chinese Hand Grenade ka, Radio Set Baofeng (UV-R) ka aser Rs 7980 ngutetogo.

# Assam Congress-i luden ka tentet

**Guwahati, August 8, 2021 (Agencies):** Bodo Territorial Region (BTR) nung Congress party indang tentet maparentem asadangshitsü nükjidong nung Assam Congress-i iba tesem nung committee ka tentettsüogo.

Iba committee ajanga BTR nung Congress party akangshidaksütsü asoshi mera tapet agia inyaksangshitsü.

"Bodo Territorial Region (BTR) nung tongtibang tentettem, Cells & Department tem densema party akangshidaksütsü asoshi

President APCC Sri Bhupen Kumar Borah-i committee ka tentettsüogo," ta Assam Congress general secretary Bobbeeta Sharma-i sangdong ka ajanga metetdaksü.

Züngsem 8 dena aliba committee nung Lok Sabha MP Gaurav Gogoi menden asütsü.

Iba committee nung MLAs Jadav Swargiary and Abdus Sobhan Ali Sarkar, Bisti Basumatary, Shankar Prasad Roy, Jewel Tudu aser Klengdon Ingti nunger dena lir; aser committee indang Convenor ji Bhaskar Dahal asütsü.

# Aaranyak-i Rhino Protection Group nem field gears agütsü



**Guwahati, August 8, 2021 (Agencies):** Guwahati nung amenoka aliba biodiversity conservation group Aaranyak-i Kaziranga National Park (KNP) nung Assam Police Rhino Protection Group nisung 26 nem field gears agütsüogo.

Bokakhat nung aliba Sub-Division Police Office den yaritepa Rhino Protection Group ketdangsür nem shoes, raincoats aser torch lights agütsü.

Iba sentong nung Sub-SDPO Ananta Hazarika, Officer-in-Charge Pradip Kumar Bora, Kaziranga anasa aliba

Aaranyak team züngsemtem-Arif Hussain, Manager, Rhino Research and Conservation Division, Sanjib Kumar Bezbaruah aser Swapan Kumar Nath nungertem aden.

David Shepherd Wildlife Foundation (DSWF) nungi teyari agia field equipments agütsü.

DSWF-i Northeast nung aser talisa Assam nung Aaranyak ajanga arem shiruru kümzüka ayutsü atema mapa inyaka arur.

Taoba mapang parnokisa Village Defence Patrol groups nema field gears agütsüogo.

# Minister Atul Bora dak Covid-19 putet



**Guwahati, August 08, 2021 (Agencies):** Assam agriculture minister Atul Bora dak Covid-19 putetogo.

Minister Atul dak iba tashidak putetba sülen Deobarnü pa Gauhati Medical College and Hospital (GMCH)-i anir ao.

"Kü dak COVID-19 aliba tejangja putetogo aser iba wara temaitsü tera lir. Kü den ajuruteper ajak dang tekaratiba nung Covid-19 tendangtsü

mepishir" ta Atul-i Twitter nung ashi.

Asom Gana Parishad (AGP) president, Atul Bora temang tajungba lir, ta party sangdong ka ajanga metetdaksü.

Taoba hopta tetenzüklen Assam aser Mizoram tsüngda arrtsü ken o dak sendakba nung Minister Bora aser minister Ashok Singhal nati Aizawl sendanga liasü aser Mizoram sorkar nungi teshimtet nübutem den senden ka menogo.



## TIR YIMYIM YIMOBILEM (EDITORIAL)

DIMAPUR TENTONÜ, LUROI(AUGUST) 09, 2021

### Ali atema raraba

**A**lima nung tongpang rara ajak ya ali aginüba ajanga tenzüka otsü lir, kechiyong nisungtem nungdak ajak ali nungi dang adoker. Ibayongji ali akar ali kiburtem dang takar ta ajar. Iba denji ano alima nung alir nisungtem tenük asungdak maka, anungji ali yabo takartemisa taginüba aginüba morua morua alitsü, atsungtsü aser rakzüktzü meranger. Idangji aiben kidanger o kidanger na aser kin o kin na tsungda meputep tenzüker aser rara adoker. Iba amaji asen lima nunga tesem aika nung kidanger o kidanger na tsungda ali am ka ana mechi nung meputepi alir aser kibong aikati külem jajatsüba yimkong lenmang dena atsungsepa agir. Aji oda, tesem aika nung atem aser jarabo pei li nung saka kilembo kidanger li nung ta morumoru pei kiojen yangluba angutsü. Item ajakji yutsür ali raktepba otsü nung tawa Assam police o Mizoram police na Mizoram arürtsülen khatepba lendong nung Assam police trok tashi khasettsüsa atalokba lendongji, India atema tamakok aser maksü otsü ka asütsü, kechiyong ibai Assam o Mizoram na rara masü saka India nung state police telok ana tsungda khatepba otsü lir. Atangji, India nung , talisa, Northeast kübok state-tem tsungda arürtsü tejangja ka lateta maka mangatettep adokba ya Assam o Mizoram na tsungda dang masü saka Nagaland aser Meghalaya state tsütsüa mapang mapang shia Assam police den mangatettep adokba osang angashir. Aji oda, tawa Assam aser Mizoram na tsungda rara adokba kasa mapang nung Assam policetemi Meghalaya aser Nagaland arürtsülena yimtsung kar nungbo timtem agüja ali atsungtsüba mapa tenzüka liasü. Iba tatalokba nungi angatetba agi, mapang kasa nung külemi dang kidanger Mizoram, Nagaland aser Meghalaya nung li ajak atsungteta aotsü Assam government terenemba aser temulungtetba liasü südi ta angatetter. Atangji, India telongjem kübok state balala küma maodang, tang küma aliba statetem, Nagaland, Mizoram aser Arunachal Pradesh ama yabo Assam state kübok dang liasü, anungji Northeast nung Assam ya tangar state ajak asoshi tsürabur state lir. Anungji, tanü ama kodang Assam o la den kidanger state na tsungda arürtsü nung ali raktepa raratepdir, iba rarajibo tsürabur o tanur na rarateperamai akümer. Aji oda, tanü tashi Assam den kidanger state-tem arürtsü melatetteti mapang mapang shia rarateptsüsa akümba ya, tsürabur state nungi state balaka küma razüka aodang arürtsü junga meladang ser kimong mesemtetdaksüba ajanga lir. Tanga state-temjibo yutsür Northeast state-tem rongnung Assam nungi mezung stata balaka küma razüka aoba state, Nagaland akümdanga India government den tezüluba nungbo Naga nung meyong "Reserved Forest" ajak Nagaland state kübok ayutsü ta 16 Point Agreement nung shia angur. Ajisüaka, ajak atema tia majung tezülubaji tezüluba nung dang toktsür iba terenembaji mapa küma aotsü asoshi asenoki süoki ia inyakba mapangbo mali asü. Ashi, Nagaland state akümba den külemi zülua aliba ama Assam den teti atema arürtsü asütsüsa "reserved forest" nungji arür long azung asübo tanü Assam den ali tsütsü mangatettep ken o kecha melii putep putepa tesünep nung lila. Iba timtem jagi küm 30 jakdang tang Mizoram o Assam police na khatepba lendong dang nungi tesashiba ataloka Nagaland o Assam police na tsungda Merapani len khatepba otsü lir. Ibaji dang masü Mokochung aser Dimapur district-tem küboka Assam den arürtsülen nübertem timtem lendong aser takoksa ajuruba mapang aiben atalokogo. Ajisüaka, akhidang Merapani nung atalokba aser tang Assam aser Mizoram police na ali raktepa khatepba amaji state o state na tsungda azü tokshia raraba agi state o state na tsungda teti atema yimjung nung alitsüsa arürtsü melatettetsü. Atangji, Assam den arürtsü melatettetba ken o ajak ya okadak benoka lir, saka okadak obendangertemia obendang magütsütetter, kechiyong Northeast state-tem arürtsü dak sendakba ken o yabo India otsü masü saka British yimli kübok aliba mapang nungi tenzüker. Aji oda, Assam aser Nagaland otsü jembidang, teti Nagaland state makümdanga Naga nung tenem nung alirtem luagi lenden nung süngo lu yima alidak alirtem dang nungi alimelen saruba otsütem yashiang atalok ama jembir. Item otsütem dakji ajemdaker, atangji akhidang Naga nung alidak aser Naga nungertemi alimelen sarua agiba alushi ajakji, tangbo, Nagaland state küboki maitettsü akok, saka item otsütemji jungjunga state ana tangatettep nung zülua yur, tang koba tashi nung Naga nung lir aser koba tashi nung Assam nungertem alir, item jengjaji asadanga teti asoshi tangatettep nung, okadak masü, Assam nungertem o Naga nungertem na tsungda latettsü merangtsüla.

## OLEMSABANG

### "Naga kin otsü aser tensa tangar dang nungi balaka lir"

~ I.Shilu Jamir - Concerned Senior Citizen Forum.

Küm ishika tejakdang Mokochung Town nung seminar alidang item nungdak otsütem jembiba tongtipangtem parnoki kanga junga züluba kaket nungi ARRTSÜ (boundary) shilem tapak kar agizüker yangi adoktsür.

Tongtipangsa asen linük litsü lilem koda kümteta yim soshia lia aruba densa artsü latetba mapang tatalokbatem koda ajurua aru item otsü ajak nübertemi lanurtemi tensen putu tarutsü nükla nung angazüka meteta ayutsü kanga nungdak ta bilema ni zungshiba kaket nungi kar agizüka lemsateper.

#### NAGA KIN ARRTSÜ TEMEJA OTSÜ

Febraury 28th 1881 küm nungi tenzüka Naga kin arrtsü latetba otsü tatsü agi yamai.

Indo Naga arrtsü ya mapang talangka nungi temeja liaaru. Ahom nungertem lenden limai marudang nungi, Naga nungertem lushi lenden lima, tanü koba dang Assam ta ajar idakji jenti liasü. Item temeja otsüren Ahom chubatemi zülua yutsüba tejangja angutsü.

Ahom nungertem shirnok Naga nungertem likhüm lenden lima nung liasü Parnoki Naga nungertem nem ali melen agüja aru. Item otsü tejangja tanü lir.

#### NAGA KIN LIKHEM NUNG ARRTSÜ YAMAI:

1. Anüdoklen :Hukong lenden aser Akyab Sea-port.
2. Anüdoklen tip : North-Kumong province of China.
3. Anüolentip : North Lakhimpur, Sivasagar (Rongpur).
4. Anüolen : Surma lenden, North Cachar Hills. Aji Naga nungertem likhüm.

Item arrtsü tejangja British nungertem India aser mekuta aliba limai arur yanglua toktsüba arrtsü lir. Indo-Naga arrtsü mangatettepji British nungertem kuli meteni tatempang kati arutettsü tasak.

1917 küm, British sorkari arrlong koba dang Goya Square Pillar ta ajar, iba ya azünga Nagaland arrtsü tejangja danger lima den meyoktepa mesüi bentet benteta yutsüba lir. Naga nungertem masüba shirnok Naga nungertem likhüm nung liasü parnok nungi British government-i luli bendener itemji independent Naga yimtsungtem nem küm nung ken agüja aru. Kasajisa British Assam Government-i Assam state anasa aliba Naga nungertem yim 23 tashi nem agüja aru. Itemji 1972 nungi anendakja lir.

Assam sorkaraser Naga yimtsungtem tangatettep nung item süngolu Naga nungertem lushi nung ken atema lapokyonga ao.

- |                         |   |
|-------------------------|---|
| 1. Bihubar Tea Estate   | 2. Lakmijan Tea Estate  |
| 3. Geleki Tea Estate    | 4. Atkhel Tea Estate  |
| 5. Deopani Tea Estate   | 6. Bursela Tea Estate   |
| 7. Tipok Tea Estate     | 8. Haluwating Tea Estate  |
| 9. Amguri Tea Estate    | 10. Laojan Tea Estate   |
| 11. Rajabari Tea Estate | 12. Simon Tea Estate  |
| 13. Charidle Tea Estate | 14. Borhala Tea Estate  |
| 15. Goro Tea Estate     | British yimsüsüba mapang nungi tenzüka Naga nungertem lushi nung yanglua akaba tang Assam nungertem Reserved forest aika maka aliritemji yamai: |

British yimsüsüba mapang nungi tenzüka Naga nungertem lushi nung yanglua akaba tang Assam nungertem Reserved forest aika maka aliritemji yamai:

- |                               |                              |
|-------------------------------|------------------------------|
| 1. Tiru Hills Reserved Forest | 2. Diphu Reserved Forest     |
| 3. Dhansiri Reserved Forest   | 4. Kakadanga Reserved Forest |
| 5. Doyang Reserved Forest     | 6. Nambar Reserved Forest    |
| 7. Geleki Reserved Forest     | 8. Desoi Reserved Forest     |
| 9. Rangapahar Reserved Forest | 10. Intanki Reserved Forest  |
| 11. Singpon Reserved Forest   |                              |

1947 kümzülutepba "9 point agreement" nung item ajakji Naga nungertem meyong asü nung Naga nungertem nem sa meyipa agutsütsü ta renema akaba tanü tashi lir. Aji magütsünüba agi iba tezülutepbaji parnoki raksa.

Kodang 1925 küm Shri.Hammid, Assam District Forest Officer aküm, pai anir Indo Naga international arrtsü koba British nungertem mapang nung lung azünga ayu ibaji Bristish sorkar aser Naga Independent yimtsungtem dang meyima aginua tenzüker aser raksatsü.

Shri. Hutton shiba Deputy Commissioner pai iba ashikülak mapa tamajung inyakbaji tasüdangba tulu yoka ashishitepa mapa tamajung inyakbaji tasügdangba tulu yoka ashishitepa liasü. Tanua itemji tezüluba nung jangjaa angutsü.

Ano Naga nungertem lushi nung totzü/resources agi yaatatsü atema Assam nungertem nem mapang tadaktet ka yur temelaba agutsü, saka kodang mapang tongdir itemji Naga nungertem meyongsa asütsüla ta tezülutepba lir.

#### Itemji:

1. Borjan colliers.
2. Naganimora colliers (ita ishika atema dang melaba)
3. Nazira colliers, with fixed taxes for certain limit.
4. Nazira Oil Field.

Tang koba Naga arrtsü tesem kar nung mangatettepi ali, itemji teküboklen toyua aliba mapatem ajanga temeten kuli angutsü akok. Naga Hills mapjiitemi:

1. 1834 Map by German Company (mezung Naga nungertem map yangluba)
2. 1843, Map by Bristish (mezung British map of Naga Hills)
3. 1864, British sorkariyangluba map.
4. 1876-1877, British sorkariyangluba map.
5. 1878, British sorkariyangluba map.
6. 1910, British sorkariyangluba map.
7. 1912, British sorkariyangluba map.
8. 1915-1916 Map by British
9. 1917, British sorkariyangluba map (Original Boundary Pillars Mark map nungertem angutsü)
10. 1925, British sorkari yangluba map, koba Shri. Hammidi anir raksatsü. Naga nungertem o India na mangatettep tenzükyonga aobaji item arrtsü otsü ajanga lir. British sorkari koba maptem yangluogo; item dakji ajemdaker Naga kin aser müküta aliba kintem den tangatettep kati arutsü nungdaker. Shidakba temeten kulijibo British sorkari yangluba map ajanga dang ngutettsü akok.

Naga kinji tangar dang nungi balaka temeja otsüren lir aser ali likhüm aser arrtsü nunga tejangja kar ta shitetbaji itemji lir. Item ajak temeten mapa bushia telemtetba tajung zülü nung ayutsü bushibaji kong tai ali? Item mapa nung taküm agüja inyakerkem lenir kübok kechiba nübori manidaktsü? Kechiba nübori item mapa nung mulungsoa yaritteptsü mejangratsü?

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

## Tuensang town nung NBCC Clean Election Campaign tenzük



**August 08, 2021:** Taoba Hokolbarnü (August 6) Tuensang nung Chang Baptist Lashong Thangyen-i ayongzüka Nagaland Baptist Churches Council kübok Clean Election Movement tenzükogo; CBLT Conference Hall, Tuensang nung "My Vote; My Future" omen nung ajemdaker Clean Election mapatong tenzük.

Iba sentong nung Deputy Commissioner & DEO, Kumar Ramnikant; CKS Tir, Nungsanglemba; DAEO Tuensang, Renben Mozhu; ES CBLT, Rev. Achu Chang; TTBPU Tir, GBs aser pastor tem den Baptist Thangyen Higher Secondary School, Tuensang nung kaketshirtem aden.

Iba sentong nung jembidang Kumar Ramnikant-i, election maparen ajak merükteta agitsü atema tajemdakdakji electoral roll lir, ta metetdaksü.

"Asenoki vote yoka chira ibaji asen temeden aser maitsü yoka achiba den kasa lir," ta pai ashi.

"Democratic inyakyim nung lenirtemji nüburtemi shimteter, anungji taila voters malitsüla aser electoral roll temereük asütsüla," ta paisa ashi.

CKS Tir, Nungsanglemba-i, state nung sensotemi electoral rolls tai yanglur, anungji electoral roll temerük asütsü atema nüburtemi ketdangsertem yaritsüla; ibaji ajanga dang

temesü lenirtem shimtetsü, ta ashi.

District Assistant Election Officer, Tuensang, Renben Mozui-i electoral roll nung temsüa alirtem tenü ang zülüoktsü aser tenü kasa zülüoka alibatem indoktsü atema mepishia metetdaksü.

Paisa, Clean Election Campaign ya inyakyim ka lir, aser iba nükjidong ataloktsü atema ajak longjemer inyaksüla, ta ashi.

Okila jembidang Chang Baptist Lashong Thangyen Executive Secretary, Rev Achu-i, tanü asenoki timtem ajangshiba ya asenok aibelen ajanga lir, ta shia temelenshi bener arutsü atema ajak longjemer inyaksü ayongzüka liasü.

## Kerala nung Khristantemi 'Eesho' film densema film ana ashishir

**August 08, 2021:** Muslim nung film yanglur kati film tasen ana nungja nung Yisu tetshibaji Yisu aser Khristan yimsü tenü menüksütsü nükjidong nung inyakba lir, ta shia Kerala nung Khristantemi film anaprong kanga ashishiogo.

Film Director, Nadirsha Sulaiman-i 'Eesho' film sangdongba sülen Khristantemi iba film nungja ashishir. Kerala nung Malayalam oshi nung Yisu dang Eesho aser Yeshu ajar.

August 5 nü Khristan aser yimtenren lenir, P.C George-i, "Onoki iba film ya Kerala nung mesayadaksütsü, kechiyong iba ya Khristan yimsü tenü menüksütsü nükjidong nung yangluba film ka lir," ta metetdaksü.

Khristan telok aikati Nadirshia indang tanabuba film-a ashishir; iba film ajanga Yisu atalar, ta Khristantemi metetdaksü.

'Keshu Ee Veedinte Nathan' (Keshu, iba kibong nung tekolak) ya Khristan

kitem nung zülua aliba 'Yeshu Ee Veedinte Nathan' (Yisu, iba kibong nung tekolak) aitsüba lir, ta Khristantemi metetdaksü.

Ajisüaka film director-ibo, "India senso ka ama kü dak secular tangatetba lir, anungji ni yangluba film tem nung tanga yimsü amangertem melung yirutsütsüsa mali," ta metetdaksü.

Nadirsha-isa, pai film nungja memelenshitsu, saka "Laishiba nungi masü" ta zülua aliba agientsü, ta metetdaksü.

Paisa, film nungja Eesho ya film nung tongti shilem agisang tenü lir, aser iba ya Laishiba den sendaktepa mali, ta metetdaksü.

Nadirsha-i, Eesho film ya ita ka tejaklen sangdonga liasü aser iba mapang nungjibo shingaia mashishi, saka taoba hopta Keshu Ee Veedinte Nadhan film sangdongba sülen ang Khristantemi film anaprong nungja ashishir, ta metetdaksü.

"Iba mangatetep ya komaser tenzükar ni memetet. Ni tanga yimsü amanger adianutem dang ya ashir- India senso ka ama kü dak secular tangatetba lir, anungji tanga yimsü amangertem melung yirutsütsüsa film meyanglutsü," ta pai metetdaksü.

P.C George-i Nadirsha dang, nai Islam yimsü mesüra ainkar Muhammad mezügmeshia film nungja agütsütetsü asü?, ta asüngdang.

"Pai yamaji mesütetsü. Khristantem ya yimjung meimba nüburtim lir, ibayongji Khristantem anema ajak inyakteter," ta George-i ashi.

Eesho nungjaji Laishiba nungi masü süra kechi nungi?, ta paisa asüngdang.

Tang tashi nungbo Catholic Arogo lenirtemi item film anema kecha mejembi, ajisüaka putir aser sayutsüngir aikati video posts ajanga item film ashishiogo.

## ANO GO ABEN TSÜNGREM DEN

### Amangbapurtem Asoshi Sarasadamba

"Kodangsa onoki nenok asoshi sarasademdir, asen Kibuba Yisu Khrista, Tebu Tsüngrem nem Onoki tenungsang agütsür." Kolosi 1:3

Paul aser Timoti nungeri Kolosi nung aliba Arogo atema sarasadamba indang asenoki lai tekong nung ya angur. Parnoki teti sarasademdir, Onök 4 atema sarasademtsüba angur (Tekong 3-5) tamang, temeim, teimla, ochi.

Asenokia pei arogo asoshi aser amangbapurtem atema sarasademtsübaji kanga tongtipang. Tamang nung amenoka aliba arogo ka asütsü atema, temeim nung tera yanga Tsüngrem dak teimla atuba arogo aser ochi asoshi tasü ita noktakba arogo asütsü atema.

arogoji na aser ni lir, ya tashi meitrs asenok ajak lulatsü, ya saksalem lira asenok ajak tanela nung aintsü. Arogoji ki teyanglubaji masü saka, idangji aliba amangbapurtemki lir. Anungji sarasadem nung kati ka asoshi teti tebu Tsüngrem aser khrista Yisu tenü nung bendanga agütsütsü yima sübadi.

#### SARASADEM:

Oba Tsüngrem, Ozü arogo ya nai saklokba arogo ka kümdakjangma. Amen

## Nigeria nung kiralongrartemi ki 300 raksatsü aser Khristan 7 tepset

**August 08, 2021:** Tan ita "Fulani kiralongrartemi mezüngbuba hopta nung Zanwrah, Kpachudu aser Nigeria nung Fulani Kpatenvien amakba sülen kiralongrartemi ki 300 jungnüa nüburtim mangyim tia nung lir. Parnoki amakba mapang nung nisung tenet tepset aser nisung tekü yiruogo," ta metetdaksü.

Taoba Honibar aonung nungi Amongnü anepdang tashi nung Fulani kiralongrartemi rongdoktsüogo aser tetsür-Miango district amak, ta Irigwe Development Association-i sangdong ka ajanga metetdaksü.

Kiralongrartemisa alu acre 100 shi raksatsü.

IDA Secretary-General, Danjuma Dickson Auta-i, "Onoki sorkar aser security agencies dang onok yaritsü mepishir, kechiyong ozü nüburtim talidak makai kümogo, alu raksatsüogo aser aika tepsetogo," ta metetdaksü.

United Kingdom nung amenoka aliba aid agency Barnabas Fund-i ashiba agi, Fulani kiralongrartemi amakba tesemji Khristan nütüng timba aliba tesem lir.

Senate Committee on Drugs & Narcotics Chairman aser Senator, Hezekiah Ayuba Dimka-i security agencies dang aibenenertem pua temerenshi agütsütsüla, ta takhangba agütsü.

"Hopta aika Riyom, Barkin Ladi, Bassa, Jos South aser Jos East local government areas nung kiralongrartemi timtem agüja arudar," ta paisa metetdaksü.

Irigwe Development Association Tir, Ezekiel Bini-i, International Christian Concern (ICC)-i iba tesem semdangba sülen osang bendenogo. Khristan kati, "Onoki alima nung Khristantem dang onok yaritsü mepishir. Nigeria sorkari onok ashioktüogo aser onok yimsü (Khristan) nung ajemdaker onoki reshikangshi ajurur," ta metetdaksü. Open Doors USA-i ashiba agi, tang alima nung Khristantem timba tepsetba linükji Nigeria lir. Tesüiba küm ishika tsüngda Nigeria nung Boko Haram, Fulani aser Islamic State-i Nigeria nung Khristan meyrjang aika tepsetogo. Tawa International Society for Civil Liberty & Rule of Law-i ashiba agi, taküm küm tenzükar tang tashi nung Nigeria nung Khristan 3,400 dak tema tepsetogo. Nigeria nung nütüng shilem 50 shibo Khristantem lir; tang iba linük nung Khristan nütüng million 95 shi lir.


**OLONG PAITEP # 5900**

1				2				3		4
5		6								
							7			
8										
										9
		10				11				
				12				13		
14										
						15				
16										

<b>TIPILEN</b>		<b>LANGTSÜNGLEN</b>	
2. Auo nung chiyongsü asenba	- (7)	1. Lenmang	- (7)
5. Mangyimba mapang	- (5)	2. Aor kidong ka tenüng	- (6)
7. O tamendakdak	- (4)	3. Tenarong maten	- (6)
8. Pei dak malangba	- (7)	4. A _ _ _ g	- (3)
10. Juli	- (7)	6. Mopung apodoka	
12. Sen ayudak	- (7)	ola adokdaksüba	- (3)
14. Tenük agi ajitet	- (4)	9. Tongtipang tagitsü	- (7)
15. Tamajung aküm	- (5)	10. Menungra bilem	- (6)
16. Apuso	- (7)	11. Aiür	- (6)
		13. S _ _ _ k	- (3)
		14. T _ _ _ r	- (3)

**OLONG PAITEP # 5899 TELANGZÜBA**

<b>TIPILEN :</b>	<b>LANGTSÜNGLEN :</b>
1. Yiar, 3. Tesola, 7. Yimra,	1. Yimti, 2. Amen, 4. Shiner, 5. Alaka,
8. Tangar, 9. Peria, 10. Tanur,	6. Satan, 9. Putet, 10. Tembar,
11. Tasen, 13. Lemjem, 15. Tambu,	11. Tatok, 12. Amang, 14. Jala.
16. Khuret, 17. Sang.	



**KIYONGER ANA SENSAXSEMA AMENER :**

**Anük** : Hai oku, tanübo nia ner kidangi ken arudanger ako, aser kidang alir ajak anema dang lir südi tu?

**Oku** : Aya anük ozü kinunger tanü tashibo ajak anema dang lir ako, aser ozü dangi na arutsüji kecha arendaka mebilemi odang arung ni. Oda tanü ama pei kibong khuret angateta aser pei kibong nung anema ali mali ajak metetba den talisa asen kiyonger osangtsüsang ajak angashir nung koda.

**Anük** : Süra oku tawa tu asen kiyonger kijung lanu ka asüba tua pa yi kangsa bangnanga jema liasüba ta nibo angashi atu. Süra aji shidakba yamaji jema liasü na?

**Oku** : Auhjatu, oda pa yi agi jemseta asüba atemaji kecha balaka tesüngmangtsü mali nung koda, aji tamasa pai yi ajemtsü tenzüka ajema meso, aji ser yi tu jema jema tesülenbo yi tu agiang pa jematokba agi pa arishi tembangtsüsa kumatok ako. Oda kodang asenok meimchir yi nung balaka chitiyongti tali südir pa/la takümji anojungi alima nungi samadoker, anungji dang nungibo nenok lanurtema kanga junga talishia alitsü merangangma. Tatishitsü agi asen teyagluri asen nem arishi küm tir (80) alima nung alitsü moatsü saka aseni tali mashi asen mekümdangbayong aseni küm rokor (60) nung dang asen takümji tembangatok, süra Tsüngrem tsüngdang asen takümji sentsütsür ka ama koda tesusatsü ka asütsü ta nibo teti kü mulung nung sasasete bilemstür adi.

**Lirir : S. Repa Pongener, Mon Bosti, Assam.**

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Koba**  
(interro) aika rongnung shimteta sayuang ta asüngdangba (which one ?)  
\* Na **koba** ita aser anogo nung aso ?

**Koda**  
(adv) kechi koma ta asüngdangba (how)  
\* Asenok tsüraburtem **koda** lia aruar asenoki metettsüla.

**NAI-A YA METETTER MA?**

France indang nüngtugu fashion brand - Louis Vuitton-i jengang tulu aketba yangkhu balala yangluba ajaki jangjaa lir. Ajisüaka, Louis Vuitton-i yimya balaka nung yangkhu ka yanglu aser iba yangkhu jengang ngua social media sabang nung nübur aika süngmangdaksüogo. Tayimtsü mesük yangkhu ya designer Virgil Abloh-i yanglua liasü aser taküm küm tetenzüklen brand indang Fall/Winter 2021 collection shilem ama iba yangkhu sayaogo. Iba yangkhu nung Louis Vuitton indang temaitsü ajena lir aser iba yangkhu jengang dollar \$39,000 (lakh 28 dak tema) asütsü.



**TANÜBO NAI LANGZÜANG**

**Q. Koba küm Operation Blue Freedom tenzük?**  
A.2018      B.2019      C.2020      D.2021  
\_\_\_\_\_ (Taruba adok nung onoki langzüksü)

**YASHI ADOK TELANGZÜBA : Waldi**

**SUDOKU # 5940**

4	9	7	8		5			1
		2				8		
8			6			7		
						9		
6	8		2	3	9		5	7
5						2	6	
					1		9	8
7	4	6	5			1	2	
	1					7		

**TELANGZUBA # 5939**

2	5	6	3	8	4	1	9	7
1	9	7	2	6	5	4	3	8
8	4	3	1	9	7	5	2	6
6	1	9	8	2	3	7	5	4
5	7	8	9	4	1	3	6	2
4	3	2	5	7	6	9	8	1
7	2	4	6	3	9	8	1	5
9	6	5	7	1	8	2	4	3
3	8	1	4	5	2	6	7	9

**OJANG LUTEP # 5485**

NGBÜNGTASDAA :

DAARUNG :

ÜKTEN :

ULUTEMNG :

NGDA :

ÜNGDMASANGI :

GZÜBTELANA :

SÜRAGÜTA :

GJEMSÜNA :

ETTSMELITÜ :

**OJANG LUTEP TELANGZÜBA # 5484**

**PEI TENÜK NUNG ANAK YUR TANGAR TENÜK NUNG ANAK TEBUSHI**

**TAN HOPTA ATEMA - KOMA SÜLA ?**

**Q. ABAM kübok arogotem nung sannükertem ya ABAM-i dang shimer mapang mapang shia, government mapa inyakerkem amato, mapang apir arogo balalai transfer and posting yoka tenzükdaksü nunga koma süla ?**



August 08, 2021 nü Academy, Mussoorie nung Rank Ceremony nung Uttarakhand Chief Minister, Pushkar Singh Dhama adenba noksa nung angur. Tang mezüing tetsür officers ana (Assistant Commandants)- Prakriti aser Diksha na ITBP nung denogo.

### India nung anonisung 39,070 dak Covid putet aser 491 asü

**New Delhi, August 08 (Agencies):** India nung anonisung 39,070 dak coronavirus putet aser ibaji densemabo tang tashi nung nisung ajak senteper 3,19,34, 455 dak iba tashidak putetogo, ta Amongnü Union Health Ministry-i metetdaksü. Tesüiba ghonda 24 tsüingda linük nung coronavirus tashidak agi shiranger 491 süogo aser tang tashi nung iba tashidak agi asür ajak senteper 4,27, 862 jungogo. Tang linük nung coronavirus agi teshirangdakpur 4,06,822 dang kümogo, aser ibaji coronavirus caseload nungi

shilem 1.27 dang lir. Linük nung coronavirus tashidak agi shiranger shilem 97.39 (nisung 3,10, 99,771) anepogo aser iba tashidak agi shiranger asüba shilem 1.34 lir. Honibarnü samples 17,22,221 tendanga liasü aser tang tashi nung samples ajak senteper 48,00,39,185 tendangogo, ta Amongnü ICMR-i metetdaksü. Tang linük nung anogo shia coronavirus positive putetba shilem 2.27 lir aser hopta shia positive putetba shilem 2.38 dang kümogo. Amongnü anepdang tashi

nung India nung coronavirus vaccine dose crore 50.68 agütsüogo, ta Union Health Ministry-isa metetdaksü. Tesüiba ghonda 24 tsüingda coronavirus agi asür 491 nungji Kerala nung nisung 139 aser Maharashtra nung nisung 128 asüba densema lir. Linük nung coronavirus agi nisung timba asüba state temji Maharashtra (1,33,845), Karnataka (36,773), Tamil Nadu (34,289), Delhi (25,066), Uttar Pradesh (22,773), West Bengal (18,217) aser Kerala (17,654) state tem lir.

### Opposition-i video ajanga sorkar nem temepishiba ka agütsü

**New Delhi, Luroi/August 08 (Agencies):** Tsüingluruwa mongpu Parliament tembangtsü joko anogo ishika dang lia opposition party ter longjemer video ka ajanga sorkar nem temepishiba ka agüja 'onoki ashiba angang' ta mepishi. Minute 3 video nungji opposition lenirtemi Parliament nung aluyimba ozüingtem aser Pegasus spyware ken o densema onük aika nung o lemteptsü takhangba agüja lir. Video nungjisa Rajya Sabha nung opposition lenirtemi jembiba otem lir. Congress lenir aser Rajya Sabha nung opposition lenir, Mallikarjun Kharge-i, "Onoki tesüiba anogo 14 tashi o lemteptsü akhanger saka nenoki

magizüker. Tang nenoki ozüingtem agizüker. Nenok tasü itta lira Pegasus ken o nung o lemtep tenzükan," ta metetdakja lir. RJD lenir, Manoj Jha-ia, "Pegasus ken o ya tang kibong ajak nung jembidar. Asenoki iba onük nung o lemteptsü," ta ashi. Iba video sayaba nung shilem agir opposition party 10 ji Congress, Trinamool Congress, Samajwadi Party, Shiv Sena, TRS, DMK, Aam Aadmi Party, CPM, RJD aser NCP lir. Rajya Sabha nung Shiv Sena MP, Priyanka Chaturvedi-i, democracy linük ka nung sorkar teinyaktsü shilem lira opposition teinyaktsü shilem-a lir, ta ashi. Laisa, "Aluyimertem onük

süaka, rongsenkettsüing süaka, tetsürtem kümzüka aliba onük süaka opposition ola parnoki nembangtsür, Parliament senden thinendaktsür aser onok meyong microphones shibangtsür," ta ashi. CPM-i, sorkari Parliamentary democracy auyar, ta ashi aser TMC nungi Sukhendu Shekar Roy-i Parliament nung o sadema jembitsü temeden aliba metetdaksü. Opposition-isa, Parliament nung Pegasus ken o nung o melemtep tashi parnoki Parliament telung nung longkak aita manentsü, ta metetdaksü. Tzüingluruwa mongpu Parliament ya August 13 nü tembangtsü.

## Center Sorkari democracy ashioktsüogo: Shashi Tharoor

**New Delhi, August 08 (Agencies):** Ato kilonser, Narendra Modi-i Opposition-i Parliament mezüingmeshir, ta aitsüba o dak sendakba nung Amongnü Congress lenir, Shashi Tharoor-i, sorkari democracy aser India nunger ashioktsüogo, ta aitsü.

Tharoor-i shidi ka ajanga Lok Sabha Speaker, Om Birla dang Panel senden nung madener ministry ketdangsertem anema inyaktsüla, ta mepishia liasü.

Senden amentsü lia ketdangser aseme iba senden nung madentsü atema tatemtsü kuli agütsü, aser iba ya panel anema inyakba lir, ta pai ashi.

Congress leniri, linük aser alima atema tongtibang onüktem nung sorkari telangzüba agütsütsü memelungba ajanga democracy aser India nunger ashioktsüogo, ta metetdaksü.

Taoba mapang Union Minister aser tang Thiruvananthapuram nungi Congress MP, Tharoor-isa, o lemteptsü memelungba aser telangzüba magütsüba ya ang chichiba Parliament mezüingmeshiba lir, ta aitsü.

Parliamentary Standing Committee on Information Technology-i Pegasus ken o atema inyaktsü asü, ta asüingdangba langzüdang

Tharoor-i, joko küm ana tashi IT committee-i sensotem indang data privacy aser security atema inyaker, aser taoba Chairman BJP nungi Anurag Thakur mapang nunga item onüktem atema inyaka liasü, ta ashi.

"Pegasus onük ya IT committee kübok lir, anungji iba committee nung züingsemtemi iba dak sendakba nung tasüingdangbatem asüingdangtsü imlar," ta pai ashi.

"Committee senden nung iba onük (Pegasus) jembiba mapang nung BJP züingsemtemi timtem agütsü," ta pai metetdaksü.

July 28 nü committee senden mena Pegasus onük densema jembitsü tebilemba liasü. Committee-i iba senden nung adentsü atema Ministry of Electronics & Information Technology (MeitY), Ministry of Home Affairs aser Ministry of Communications (Department of Telecommunications) nungi ketdangsertema jaoka liasü, saka committee nung BJP züingsemtemi attendance register nung sign masüba agi iba sendenji magitet.

Tharoor-isa, Pegasus onük nung Opposition teimlaji Supreme Court dak dang lir, ta shisem.



August 08, 2021 nü Varanasi kübok Maruthi Nagar kiyong nung NDRF sepaitemi tzümetsüing nungi nisungtem kümzüka mapang tangokba noksa nung angur.

### Kashmir nungi kiralongra agientsü: J&K LG

**Srinagar, August 08 (Agencies):** South Kashmir kübok Kulgam district nung police tepsetba aija Amongnü Jammu & Kashmir Lieutenant Governor, Manoj Sinha-i Kashmir li nungi kiralongra tera nungi atsüdoktsü, ta metetdaksü.

Honibar nikongdang Kulgam district kübok Adijan crossing nung kiralongrartemi police party ka amakba mapang nung police ka khaset aser ana yirua liasü.

Asür constable, Nisar Ahmad Wagay'er yim semdangba sülen Sinha-i,

"Yasüing kiralongrartemi amakba sülen ni iba tesem semdangba ajanga kiralongrartem nem osang ka sangoktsür. Iba li nungi kiralongrartem aser parnok pusemertem tera nungi atsüdoktsü. Sorkari lenla ajaklen terenlok mapa inyaktsü," ta metetdaksü.

"Tanü Kulgam semdangogo; taküm tenla agütsür Nisar Ahmad nem akhüm agütsüogo. J&K administration-i mangyimer kibong den mangyim jashi lemsateper aser akokba tashi nungita yaritsü," ta LG-i twitter ajanga metetdaksü.



New Delhi, August 08, 2021: Amongnü New Delhi nung All India Institute of Ayurveda (AIIA) nung Ports, Shipping, Waterways & AYUSH Union Minister, Sarbananda Sonowal-i jembiba noksa nung angur. Kasa noksa nungsa Minister of State for Women & Child Development and AYUSH, Dr Munjapara Mahendrabhai den tongti ketdangsertema angur.

# Taliban-i Afghan provincial capital ana agiogo



Afghanistan north tsütsü Kunduz yimti nung Taliban aser Afghan sepai tsungta raraba sülen raksar aliba dokan tem nungi mokozü adokba noksa nung angur. Taliban teloki governor indang office aser police headquarter densema Kunduz province indang yimtiba tulubalen agiogo, ta provincial council züngsem kati ashi.

## Kabul, Luroi/August 08 (Agencies):

Taliban-i Deobarnü ano provincial capital ana atsüngogo. Tawa linük tezülen tesem timba ka atsüngba sülen yimitem atsüngtsü atema raratepba mapang tang yimti ana atsüngba ajanga parnok tejakdang kümdaktsüogo.

Hokolbarnü nungi Deobarnü tashi nung Taliban puri provincial capital pezü atsüngogo aser tanenmakai raraba ajanga sorkar sepaitem tawadadk makai kümdaktsüogo.

Linük anüotktip len Kunduz aser Sar-e-Pul yimti ya ghonda ishika tsüngda atongtepa atsüngogo, ta lenirtem aser

yimti nung alirtemi metetdaksü. Sepaitem den kanga sashia raratepba sülen iba yimti ana atsünga liasü.

May ita nungi tenzüka linük kübok tesem balala atsünga aruba rongnung Kunduz yimti atsüngba ya Taliban asoshi takok tulutiba asütsü.

Taliba asoshi iba yimti atsüngtsü ya tongtibangtiba liasü, koba parnoki 2015 aser 2016 küm mapa tatsüka atema atsünga liasü, saka parnok tazüokba kübok mapa talangka meyetet.

Ministry of defence sangdong ka ajanga ashiba agi, sepaitemi iba yimti tanaben agitsü atema raradar.

"Commando temi yimti

meita odar, national radio aser TV building tem densema tesem kar nungi kiralongrartem maktokogo," ta kasa sangdong ajanga metetdaksü.

Linük anüotktip kümzüka meyetetba ya sorkar atema liyonga aodang timtem asütsü.

Afghanistan anüotktip ya mapang talangka Taliban anema nokdakba tesem ka liasü aser 1990s nung telungpurtemi yimsüsüba mapang iba tesem nung alirtemi kanga meranga nokdangogo.

Hokolbarnü Taliban-i Iran den arrtsü nung aliba Nimroz yimtiba Zaranj atsüng aser iba sülen anogo ka lir Jawzjan province yimtiba Sheberghan atsünga liasü.

# Northwest Syria nung sorkari kibong ka nungi tanur pezü tepset

## Damascus, Luroi/August 08 (Agencies):

Syria sorkari linük nung sorkar anemertemi amokbanga aliba tesem tatembangba nung prangbong tulu amshia injang aser bomb khaloktsüba mapang kibong ka nungi tanur pezü tepset, ta tekumzüka mapa inyaker aser rara asadanger temi ashi.

Opposition telok kübok aliba tesem nung teyari mapa inyaker, shirnok dang White Helmets ta ajar, parnoki ashiba agi Honibarnü injang tulu aser bomb ya Hama province anüolen tsütsü Qastoun yimtsüng nung nisung alidak tsüka nisung pongu kangasa mejungi yirua liasü.

Britain nung amenoka aliba rara asadanger, Syrian Observatory for Human Rights (SOHR) ajanga iba lendong nung tanur pezü asü, ta ashi.

Northwestern Syria nung tang mitkartemi raraba nung

shilem ka ama item injang tulu aser bomb ya khaloktsüba lir, kong Russia aser Turkey tetsüngtai ia taoba küm nungi ceasefire nung liasü.

Idlib region nungya nisung million asem jungnüa alir, aser parnok ya shilem asem sadanger shilem ana shi linük tesem balala nung küm aika civil war aliba mapang arua jenokba tem alitsü.

Iba tesem nungya taoba mapang Syria indang al-Qaeda den sendaktepa alirtem agi sünga lir, saka yangji ano danga opposition teloka aika lir.

Tir Bashar al-Assad kümsük tasen asoshi tenangzüktep agiba sülen mitkartemi northwest tsütsü bomb tali pokloktsüba tenzü. Tir Bashar al-Assad-i tasoli nüji mangu aliba ngudaktsütsü nangzüka lir.

Taoba küm Russia-Turkey ajanga yimjung ken o benoka jembiba nung Syria sorkari

molunga liasü, aser parnoki küm 10 rara nung samar aliba litsü tanaben agitsü nangzü. Iba linük nung rara anena atatsü ken o ya 2020 küm March ita Turkey aser Russia tsüngta jembia liasü. Turkey-i Syria opposition busemer aser yangji par sepai yoka lir, aser Syria sorkar yarir rongning Russia nung tongtipangtiba lir.

Sorkar meyong sepaitem ya Deraa province nunga telok balala den rarayonga arur. Deraa province nung taoba ita nungi tenzüka rara ya 2018 küm sorkar küboki aitba sülen iba tesem nung tesashitiba alitsü, ta SOHR ajanga ashi.

Taoba mapang sorkar anema nokdaker telok nungi züngsem aika Deraa nungya lir aser parnok ya tanaben mitkar nung züngsemer mesüra province tesem kar nung yimsü süa alir.

# Tzümetsüng agi kongshir alidak Kim Jong-un-i teyari agütsütsü ashi

## Seoul, Luroi/August 08 (Agencies):

North Korea lenir Kim Jong-un-i mitkartem dang tawa tzünglu kanga sashia aruba ajanga kongshiba tesem nung teyari mapa inyaksü ashi.

Tzümetsüng adokba ajanga nisung aliba ki 1,000 dak tema raksa aser nisung 5,000 shi anir ainshitsüsa akum, ta hopta tetenzüklen state television ajanga shia liasü.

Rongsenketzüng tsütsü timtem ajurutsü aser achi-ajemtsü angi anüngtsü ta shisabulua aliba mapang iba mera ya agir.

Aluyimba li raksatsüogo aser linük nung chiyongtsü tebilemstü lir, ta Kim Jong-un-i June ita shia liasü.

Aluyimba tsütsü taoba küm yipru tesashi arua tzümetsüng adokba ajanga nükjidong ayuba metongteti aliba mapang taküm aluruba nung metaloka alitsüsa akumer, ta pai ashi.

Sorkar meyong KCTV ajanga video sayuba nung South Hamgyong province nung ki aika kilem tashi tzü agi metsüngbanger aliba, apu aser rail lenmang raksar aliba nguogo. Iba mapang lenmang aser apu kilometer 17 shi raksa, ta ashi.

Ayong nung tzü metsüngba nokdangtsü yanglua aliba jara laoba ajanga aluyimtsü ali hectare noklang aika tzü agi mubang, ta osang ajanga ashi.

North Korea nung tang

yimsü tesüdak Workers' Party indang Central Military Commission pur iba lendong nungi shia arutsü asoshi jembishinütsü senden ka Brehostibarnü amen, ta KCNA news agency ajanga ashi.

Iba senden nung Kim maden saka region nung mitkartemi nüngdakba teyari agütsütsüla, ta party ketdangsurtemi pa nem osang sangoktsü, ta KCNA ajanga ashi.

Ali tashi miti kumer asünung maneni tzünglu arura, teraksa tali agütsütsü.

Linük anüdoklen tzünglu tesashi ya August 10 tashi arutsü, ta linük nung tzüngsangmopung takzüba agency ajanga ashi.

North Korea nung nuclear sentong mechi linük balalai iba linük nung tenokdangba agüja tim atemba mapang ka lir.

COVID-19 tashidak prokshia aoba nokdangtsü mechi iba linük indang arrtsü shibanga lir, anungji China den shishilempaba nunga tetsükdaktsü ajuru. North Korea ya chiyongtsü, ali temu aser totzü nung China dak metaloka alir.

Soviet Union laoba sülen 1990s mapang North Korea tesem ajungalen ayawara agi timtema liasü. Iba mapang nisung yaseta asüba ya tejangja memetet saka nisung million asem jungnüa asü alitsü, ta asadangteta lir.

# COVID-19 mechi Beijing-i tenokdangba tasen agütsü

## Beijing, Luroi/August 08 (Agencies):

Covid-19 wara prokshia aoba nokdangtsü atema Beijing-i, tashidak kanga kara prongshia oya aliba tesemtem nungi yimti-i arutsü alirtem nem tenokdangba tasen agütsüogo.

Chinese state media Global Times sangdong ka ajanga ashiba agi, medium mesera high-risk tesemtem nung alirtem shirnok Beijing-i aotsü sentong yangludat, parnok air aser railway services amshitsü atema ticket alitsü memelatsü.

Beijing yimti ketdangsurtemi, nüburtem shirnok tang tashi medium aser high-risk tesemtem nung lir parnok indang code tenenya (yellow) sentsü agi melentsütsüogo aser health code tamak (green) bena melira Beijing-i aotsü atema tayimtsü mesera train-i metudaktsütsü, ta ashi.

China kübok yimti balala nung Covid-19 tashidak kanga kara menatepyonga aoba mapang ka nung iba osang metetdaksüogo. Tang province aser municipalities 15 nung tashidak keta aliba temaitsü sayuba shiranger 500

dak tema lir. Beijing Daxing International Airport-ia, Nanjing, Yangzhou aser Zhangjiajie densema yimti 15 nungi tayimtsü arutsü memelatsü ta metetdaksüogo.

Airport indang deputy general manager Wen Wu-i, "Beijing Daxing International Airport-i, Nanjing, Yangzhou aser Zhangjiajie amala yimti 15 nungi tayimtsü marudaktsütsü telemtetba agiogo," ta ashi.

Kasa mapang nung linük nung COVID-19 wara poktetshiba ajanga Beijing International Film Festival dena thinenogo, ta iba sentong ayongertemi Brehostibarnü metetdaksüogo

"Linük kübok tesem aika nung wara poktetshiba ajanga 11buba Beijing International Film Festival, koba August 14 nungi 21 tashi agitsü liasü, iba sentong ya ajak kümzüka toktsütsü atema thinenogo," ta ketdangsurtemi metetdaksü.

Ajisüaka sentong ayongertemi iba benjung kobaika thinentü iba indang osang kecha magütsü, ta Sputnik sangdong ajangsa metetdaksü.

# Kisama nung Metümnyo benjong mungogo



Kohima, Luroi/August 08, 2021: Kisama nung Metümnyo benjong agiba mapang Nagaland Bio Resource Mission (NBRM) Chairman, L. Thronghokiu-i telok den jembiba yangi noksa nung angur.

**Kohima, Luroi/August 08, 2021 (TYO):** Honibarnü, Kohima nung alir Yimchunger kin-i Naga Heritage Village Kisama kübok Metümnyo benjungmung sentong ayonga agiogo. Iba sentong nung Nagaland Bio Resource Mission (NBRM) Chairman, L. Thronghokiu alaketa tejaoker ama aruagi dena liasü, ta sangdong ka ajanga metetdaksü.

Iba sentong nung Thronghokiu-i, tanur tasen asoba aser kasa küm akümlü nungi pila aoertem nem akhüm tetushi agütsütsü asoshi iba benjong amunger, ta ashi.

Tang yimsü süa aliba sorkar maparen nung nungitta yaritsü asoshi pai Yimchunger lennirtem dang mepishiogo.

Mezüngbo Metümnyo benjong ya akhümtsüba aser tushia munga liasü, saka tejashitsüka tawa tanü asenok kin tsüngda iba tanela sama odaki, ta pai ashi.

Anungji, iba benjong tetezü shitak angateta aser meraketa amungtsü asoshi asenok ajak longjemer inyaksüla, ta pai ashi.

Eastern Naga tesem nung, nütsüng yongsük medemdangra Konyak sülenbo Yimchunger asütsü, ajisüaka, iba tesem nung nübur tsüngda telongjem maliba, nukmerem aser kati kati majung jembitsüba ajanga lenmang aisü nung timtem adoker, ta pai ashi.

Telemsa adokdaksütsü melen, yimji yimjung bener arutsü atema asenoki Naga nunger tanüngba kin den longjemer inyaksüla, ta pai shisem.

Mission Director, NBRM Dr. Kroulalie-i pei kin sobaliba temaitsü kümzüka ayutsüla ta ashi. Alima nung temelenshi adokba den asenok tsüngda Western yimyatem nung anidakba ajanga nüburtemi pei sobaliba tajung aika nungi pila odar, ta pai ashi.

Tarutsü mapang asoshi,

asen tetsü-tebui sayua benshia aruba sobaliba aser yimsü tajungtem mesamadaksütsüla aser asen taküm nung itemji teti amshitsüla, ta pai telok ajungshia liasü.

Metümnyo benjong ya August 01 nungi August 08 tashi munga aru. Ajisüaka, tawa tanü iba benjong anogo asem (August 06 nungi 08) tashi dang agir.

Maneni, iba sentong nung, YUK vice president Akumba meden liasü. Advisor YUK, T Kejingkhum-i telok pela agizük aser YUK General Secretary, T. Kiusangthong-i tepela anküp o jembü. Sentong tenzüka YBBK, Pastor Wongtokiu-i sarasadem aser sentong tembanga Associate Pastor (women) YBBK C.Rachel-i sarasadema liasü.

State Sorkar ajanga lateta aliba Covid-19 SOPs nung anidaka Yimchunger union Kohima-i iba benjong ayongzük, ta sangdong nung shia lir.

# KANGA PELAR



ASO:  
08-08-1950

ASÜ:  
26-07-2021

Ozü temeim tsürabur, **David Imchen** (Mangmetong) iba akümlü arishi tembanger aoba mapang, shirnokisa sarasadem, nebu aser rongsen tenla agi onok asükhu aser mangyim mapang yaritepogo nenok ajak dang kangasa pelaba iba sabang ajanga lemsateper.

Nenoki temeim mapa sayuba yari onoki kecha meyipa magütsütsü saka Kibuba Tsüngremi nenok kija, kibong aser lokti talubosa moajangma ta sarasademer.

**Temeim Kinungtsü, Tanurtem & Kinungertem.**



Dimapur, Luroi/August 08, 2021: Honibarnü, Jakhama yimtsüng nungi Tase lanurtemi Dziikou tsütsü Pazii tesem nung süngdong tema aoba yangi noksa nung angur. Libajen kümzüka ayutsü nükjidong yur iba plantation drive ayongzüka liasü aser Tase lanurtemi 'alder' den 'cherry' süngdong 500 dak tema temoktsüogo, ta sangdong ajanga metetdaksü.

# 8th Western Angami nungi NDPP pur senden amen



Kohima, Luroi/August 08, 2021: Sechu Zubza nung 8th Western Angami A/C nungi NDPP ketdangsurtem külemi tangokba noksa ka yangi angur.

**Kohima, Luroi/August 08, 2021 (TYO):** Honibarnü, Sechu Zubza nung 8th Western Angami Assembly Constituency nungi Nationalist Democratic Progressive Party (NDPP) pur executive senden menogo, ta sangdong ka ajanga metetdaksü.

NDPP president, Chingwang Konyak aser chief minister Neiphu Rio naprongla dak lennir sempet tajung aliba aser lennir tetemsü ta ajiteta,

iba senden nung teloki lennir anaprongla nungitta yaritsü asoshi bangjemtep.

Western Angami Assembly Constituency nung meranga züngsem talila anioktsü asoshi teloki lemtet.

Kasa senden nung, taoba NDPP züngsem, asür Er. Kevisekho Kruse aser tanga assembly constituency nungi ketdangpurtem, shirnok tawa tashi iba akümlü nungi pilaogo, parnok bilemteta teloki minuter

ka süngjema mokremer akhüm agüja liasü.

Maneni, iba senden nung women wing aser youth tentet densema assembly constituency nungi central aser region office ketdangpurtem aruagi denogo, sangdong ka ajanga 8th Western Angami A/C indang NDPP president Neivikolie Khatsu aser general secretary Aselie Punyu nati metetdaksü.

# Noklak nung nübodok mapa ayongzük

**Noklak, Luroi/August 08, 2021 (TYO):** Aruya aliba Independence Day

benjongmung dak sendakba nung, Honibarnü Noklak Town kübok sorkar office tesem densema Noklak Hq indang sector ajak nung nübodok mapa inyaka liasü, ta sangdong ka ajanga metetdaksü.

Cleanliness drive aser nübodok mapa inyakba mapang, Noklak Town nung alir nübur aser sorkar wadang nung inyaker ajaki shilem tajung agiogo. Parnoki sorkar office telung aser temeküt, lokti kazüba tesem, lenmang aser tzi aolen (drainage) merüktetta liasü.

Maneni, Noklak Deputy Commissioner, Hiazu Meru-i sangdong ka ajanga, Noklak Hq nung 75buba India

Independence (Azadi ka amrut mahotsav) atema teküboklen agüja aliba maparen inyaksü, ta metetdaksü.

August 09 aser 10, 2021 nü teintet rogu (senior citizens - arishi küm 75 nungi temapur) nem tenüngsang agütsüba den külemi sempet agütsütsü. EAC Noklak Hq, Kathyinla-i iba sentong ketdang asütsü.

August 11, 2021 nü open online quiz competition ayongzüksü, kong officer in-charge ji EAC Noklak Hq, Kathyinla asütsü. August 12, 2021 nü Noklak town kübok EAC Noklak Sadar, P. Pukha ajanga special Covid-19 vaccination camp ayongzüksü.

Tekalen agüja aliba maparen ajak SDO (Civil) Noklak Sadar, C. Phuniang ajanga achaayangtsü, ta DC-i shisem.

# Tokyo 2020 Olympic Games nung India-i medal 7 ngutetogo



Olympics shibangba sentong nung bronze medalist Bajrang Punia-i India wako amer aoba noksa nung angur.

**Luroi/August 8, 2021 (Agencies):** 32buba Summer Olympic Games takok nung tembangogo. Iba Olympic Games ya kanga balaka liasü, kong terpranger marudaktsü aser Covid dak sendakba tetuyuba balala kübok asayaogo. Iba den Japan nungertem aikati iba asayamung ayongzüka masayatsü atema anema nokdak liasü. Ajisüaka Tokyo 2020 nung asaya balala nung otsü tasen aika yangluogo. Tebur 100-meter butterfly nung Caeleb Dressel-i otsü

tasen yangluba nungi tenzüker tetsür 400-meter hurdles nung Sydney McLaughlin-i otsü tasen yangluba densema asaya balala nung otsü tasen aika yangluogo. Taküm Olympics nung otsü tasen yangluba kar yamai alitsü: Women's Track Cycling Team Pursuit - Germany (4:04.242) Men's Track Cycling Team Pursuit - Italy (3:42.032) Tatjana Schoenmaker, Women's 200-meter breaststroke - South Africa (2:18.95m) Caeleb Dressel, Men's 100m Butterfly - USA (49.45

seconds) Men's 4x100m Medley Relay - USA (3:26.78m) Aleksandra Mirosław, Women's Speed Climbing - Poland (0.12 seconds) Lasha Talakhadze, Men's Weightlifting - Georgia (488 kg) Women's 4x100m Freestyle Relay - Australia (3:29.69) Yulimar Rojas, Women's Triple Jump - Venezuela (15.67 meters) Karsten Warholm, Men's

400m Hurdles - Norway (45.94 seconds) 1500m - Kenya (3min 53.11sec) Iba Olympics ya India asoshia tajungtiba asayaba Olympics ka liasü. India team-i taküm medal 7 koktetogo. Mirabai Chanu-i silver medal ka ngua tenzüker aser la sülen Lovlina Borgohain, PV Sindhu, Bajrang Punia aser tebur hockey team-i bronze medal angu. Maneni Ravi Dahiya-i wrestling nung silver medal ka angu aser Neeraj Chopra-i javelin throw asaya nung gold medal ngua liasü.

## Olympic medal count 2021 top 20

Country	Gold	Silver	Bronze	Total
USA	39	40	33	112
China	38	32	18	88
Japan	27	14	17	58
Great Britain	22	21	22	65
ROC	20	27	23	70
Australia	17	7	22	46
Netherlands	10	12	14	36
Germany	10	11	16	37
Italy	10	10	20	40
France	9	12	11	32
Canada	7	6	11	24
Brazil	7	6	8	21
New Zealand	7	6	7	20
Cuba	7	3	5	15
Hungary	6	7	7	20
South Korea	6	4	10	20
Poland	4	5	5	14
Czech Republic	4	4	3	11
Kenya	4	4	2	10
Norway	4	2	2	8

## Leicester City-i Community Shield kokogo

**Luroi/August 8, 2021 (Agencies):** Honibarnü nü Community Shield asaya FA Cup koker aliba team Leicester City-i goal 1-0 agi Premier League champions Manchester City kokogo. Asaya nung Kelechi Iheanacho-i penalty ka idakja parnoki iba asaya akok. Iba takok densema Leicester-i Wembley Stadium nung asaya ana atonga kokogo. Parnoki May ita FA Cup final nung goal 1 agi Chelsea akok, saka parnok Premier League nung jenjang pongububa nung tembanga liasü.

Asaya penalty metsüteper takoker bendangtsü imlaa liasü saka minute 89buba nung Nathan Ake-i Iheanacho alangdaktsüba sülen Leicester nem penalty metsütsü maongka agütsü koba Iheanacho-isa idakja liasü.

"Ni penalty metsüshia liasü. Taoba season nung ni penalty ka metsüpet anungji pre-season nung penalty metsüshia aruogo. Kü mulung nung angle ka nung tashi agi metsütsü dang bilem aser yamaji metsü," ta pai ITV television dang ashi.

Pounds million 100 agi alisang Jack Grealish-a Manchester City nungi halftime sülen mezüngbuba iba asaya nung asayaa liasü ajisüaka

mezüngbuba asaya tamakok nung tembangogo.

Asayar tejentem aika yirur temang anepaluba mapang ka nung City manager Pep Guardiola-i, academy asayar pongu aser lanur asayar Edozie aser Cole Palmer na anioka asayadaktsü.

"Parnoki kanga junga asayaogo aser talisa season tetenzüklen iba ama asayatetba ya kanga junger aser tanabuba shilem nung onoki kanga junga asayaogo," ta Guardiola-i ashi.

"Renemshitsü asoshi mapang atsüraka loan nung asayartem aser academy asayartemi kanga junga asayaogo," ta paisa ashi.

Leicester atema hopta tom nung France nung defender Wesley Fofana friendly asayaba mapang tetsüng raksaba sülen tetsükdaktsü adok, saka striker Jamie Vardy-i anir asayartem timba asayatetogo.

Iba asaya repringtsü atema fan 53,000 shi nem temelaba agüja liasü.

Kasa mapag nung Man City pur August 15 nü Tottenham Hotspur den asayaa Premier League season tasenba tenzüksü aser anogo ka lir Leicester pur kidang Wolverhampton Wanderers den asayatsü.

## Küm 21 sülen Messi-i Barcelona toktsür

**Barcelona, Luroi/August 8 (Agencies):** Lionel Messi-i Deobarnü pai FC Barcelona toktsüba osang jangjashitsüogo. Club-i pa taa magütsütetsü ta ashiba sülen iba osang metetdaktsü. Paisa, French club Paris St Germain nungi asayatsü atema sensaksemdar, ta ashi.

France nung osang kaket L'Equipe-i Deobarnü sangdong ka ajanga, Argentine nung asayar ya Deobarnü mesera Hombarnü France yimtibai medical test atema aser Qatar Sports Investment meyong club den tenangzüktepba tembanga yanglutsü atema arutsü, ta sangdonga liasü.

Ajisüaka Messi-i pa kechi südir süaka PSG nungi asayatsü ta mashi aser akokba tashi kobika asayatetdir asayatsü ta ashi. "Ni toktepa asayatetba tashi aser kü temangi melaba tashi asayatsü," ta pai osang benertem dang ashi.

"Ni akokba tashi maneni tokteptsü," ta pai ashi.

"Ni akokba tashi ajemalua aser akümtsüba agüja inyaksangshio go aser ni club toktsür oaka iba ya mesamatsü imlar," ta Messi-i nüktzü neta ashi. Messi den tepila sentong agiba mapang fan tem noklang aika Barca indang Camp Nou stadium kima pa den tatembang salem lemsateptsü atema adenshi. Fan temi pa dang Messiah ta jaa aruogo.

Arishi küm 34 tain asayar, shiba Barca nungi küm 21



Camp Nou stadium, Barcelona nung osangbenertem den sensaksem tenzüksüba mapang Messi temulung raksaa ajepba noksa nung angur.

asayaogo aser asoshi goal (682) timtiba indaktsür lir, pa tatem o mejembi tsüngda kanga temulung raksaa ajeb. Media, tang aser taoba teammate tem aser coach temi pa nem akhüm tetushi agüja nokdaker teka maa agizük.

Messi-i ashiba agi, pai club toktsür maotsü ta bilema liasü aser pa taa shilem 50 ajemer küm pongu atema tenangzüktepba ka yanglur liasü ajisüaka taoba hopta temamangtsüka inyakyim ajak melenshi.

"March ita election agiba mapang ni club tir Laporta den sensaksemogo aser iba sülen ni

club nungi maneni asayatsü ta temulung lema liasü," ta pai ashi.

"Kü indang contract nung kecha tetsükdaktsü mali. Ni akokba tashi ajak inyakogo. La Liga-i memelaba ajanga tamakok nguogo ta club-i ashi. Ni club toktsür maotsü atema akokba tashi merandangogo. Taoba kumbo ni club toktsür onüa liasü aser ni shiogo, saka takümübo tebilemba melenshir liasü," ta pai ashi.

Barca nungi asayaba mapang pai akokba takok marok 35 prongla club-i agizük aser osang benertem den sensaksemba sülen private photo session ka agitsü ta ashi.

## BILEMDANGANG

"Pei sasa dak temulung lemtetra tamakoktsü ajak koktettsü."